

## CONVENIO DE COLABORACIÓN ENTRE A UNIVERSIDADE DE SANTIAGO DE COMPOSTELA E A FEDERACIÓN GALEGA DE MUNICIPIOS E PROVINCIAS RELATIVO Á MEDICION DE GAS RADÓN EN POSTOS DE TRABALLO DOS MUNICIPIOS DE GALICIA

---

En Santiago de Compostela, [data/sinatura dixital]

### REUNIDOS

D. Antonio López Díaz, en calidade de Reitor da Universidade de Santiago de Compostela, con sede no Colexio de San Xerome, Praza do Obradoiro, s/n,15782 Santiago de Compostela e con CIF Q1518001A.

D. Alberto Varela Paz, na súa condición de Presidente da Federación Galega de Municipios e Provincias (de aquí en diante FEGAMP), con NIF nº V15160963, actuando en nome e representación daquela, segundo prevén os seus estatutos.

Interveñen en función dos seus respectivos cargos no exercicio das atribucións que teñen conferidas no nome das entidades que representan e,

### EXPOÑEN

Primeiro.- Que a Universidade de Santiago de Compostela leva a cabo actividades de investigación, docencia e desenvolvemento científico e tecnolóxico co obxectivo fundamental de fomentar a xeración de coñecemento e mellorar o benestar da poboación galega.

Segundo.- Que o Laboratorio de Radón de Galicia, encadrado dentro do grupo de Investigación GI-1956 “Epidemioloxía, Saúde Pública e Avaliación de Servicios de Saúde”, pertence á Área de Medicina Preventiva e Saúde Pública, da Facultade de Medicina da USC e foi creado no ano 2005.

Terceiro.- Que o mencionado Laboratorio é de referencia a nivel internacional, participando na elaboración do documento de referencia da Organización Mundial da Saúde, no artigo máis citado sobre radón residencial e cancro de pulmón, e publicando máis de 50 artigos en revistas científicas con factor de impacto. Neste Laboratorio dirixíronse numerosas teses de doutoramento sobre o tema, dúas con premio extraordinario de doutoramento, e recibiu numerosos premios de investigación. Asemade, o Laboratorio mantén o Mapa de Radón de Galicia na súa páxina web ([www.radón.gal](http://www.radón.gal)), que inclúe máis de 5.000 medicións de radón en vivendas galegas. Este Laboratorio tamén participou no Mapa de Radón de España por encargo do Consejo de Seguridad Nuclear.

Cuarto.- O Laboratorio de Radón de Galicia foi acreditado pola Entidade Nacional de Acreditación (ENAC) para a medición de radón en aire en 2019. Foi o segundo Laboratorio Acreditado pola técnica de trazas e é o único acreditado en España para a medición de radón en continuo. Así mesmo, está rexistrado como Laboratorio de Ensaio do rexistro RELAGA, do Instituto Galego da Vivenda e Solo. Polo tanto, cumpre todos os requirimentos legais para medir radón tanto en vivendas como en lugares de traballo. O Laboratorio de Radón de Galicia xa fixo medicións de radón interior en numerosos concellos galegos, o primeiro no ano 2005.

Quinto.- Que a Federación Galega de Municipios e Provincias ten entre os seus fins promover, representar e defender os intereses das Entidades Locais ante outras Administracións Públicas, conforme o disposto no artigo 6.1, letra b) dos seus Estatutos.

Sexto.- Que a exposición a radón en espazos interiores é un problema coñecido en Galicia, que afecta a todo o seu territorio, tal e como recolle a autoridade de protección radiolóxica (Consejo de Seguridad Nuclear) e que en ocasións son necesarias intervencións que permitan reducir tal exposición, tanto no ámbito residencial coma no ámbito laboral.

Sétimo.- Que a exposición a radón debe medirse seguindo as recomendacións legais vixentes tanto no Código Técnico de Edificación (Real Decreto 732/2019, de 20 de decembro de 2019), coma na Directiva Europea (DIRECTIVA 2013/59/EURATOM) pola que se establecen normas de seguridade básicas para a protección contra os perigos derivados da exposición a radiacións ionizantes. Ámbolos dous documentos establecen os requisitos técnicos que deben cumprir os laboratorios que midan radón.

Tendo en conta o anterior, a Federación Galega de Municipios e Provincias e a Universidade de Santiago de Compostela manifestan a súa vontade de colaboración e con tal finalidade acordan subscribir o presente Convenio de Colaboración con suxeición ás seguintes

## CLÁUSULAS

### PRIMEIRA.- Obxecto

O presente convenio ten por obxecto sentar as bases da colaboración entre o Laboratorio de Radón de Galicia, da Universidade de Santiago de Compostela (Facultade de Medicina), e a Federación Galega de Municipios e Provincias para a medición de radón interior nos postos de traballo situados nas administracións locais de Galicia interesadas en coñecer a exposición a radón dos traballadores e tomar as medidas oportunas de ser o caso.

### SEGUNDA.- Obrigas das partes

Coa fin de garantir a execución do obxecto do presente convenio, todas as partes terán a obriga de colaborar activamente para a consecución do seu obxecto. Polo tanto, os compromisos adquiridos polas partes serán:

#### a. Obrigas da Universidade de Santiago de Compostela

- Manter a acreditación do Laboratorio de Radón de Galicia e aqueles requisitos que o sitúen coma entidade con capacidade de dar medicións de radón de acordo coa lexislación vixente.
- Facilitar a interlocución entre o Laboratorio de Radón de Galicia e os concellos interesados na medición de radón para: establecer contacto co laboratorio, facer as tarefas de medición de radón en postos de traballo en tempo e forma e proporcionar os resultados correspondentes aos concellos galegos que desexen facer estas medicións co Laboratorio.
- Proporcionar a posibilidade de facer descontos no prezo das medicións de radón aos Concellos que desexen acollerse a este convenio. O Laboratorio de Radón de Galicia non é unha entidade con ánimo de lucro.

#### b. Obrigas da Federación Galega de Municipios e Provincias

A Federación Galega de Municipios e Provincias colaborará activamente para a consecución do obxecto do presente convenio e a tal fin asume como obrigas as seguintes:

- Difundir a relevancia do gas radón en Galicia como posible carcinóxeno que pode estar presente nalgúns postos de traballo dos Concellos de Galicia
- Enfatizar a importancia cumprir os requisitos legais de medición de radón, tal e como especifica a normativa laboral actual (Instrución IS-33 do CSN) e o Código Técnico de Edificación (Real Decreto 732/2019, de 20 de decembro de 2019), que son: Acreditación do Laboratorio correspondente e ademais ter presentado a declaración responsable como laboratorio de ensaio para o control da calidade da edificación ante o órgano competente da comunidade autónoma. Ambos requisitos cúmprense polo Laboratorio de Radón de Galicia.
- Difundir a existencia deste convenio e promover a súa execución entre as entidades locais de Galicia, coas actuacións que constitúen o obxecto do presente convenio.
- Informar da recomendación da medición de radón nos postos de traballo dos Concellos galegos. Os Concellos que desexen acollerse a este Convenio se comunicarán coa FEGAMP que á súa vez o comunicará ó Laboratorio de Radón de Galicia.
- Facilitar o desenvolvemento do Mapa de Radón de Galicia, por parte do Laboratorio de Radón de Galicia, a través desta colaboración coas administracións locais.
- Os concellos que o desexasen, tamén poden ofertar medicións aos veciños dentro do termo municipal acolléndose ás cláusulas anteriores. Para isto, estableceranse acordos propios entre o Laboratorio de Radón de Galicia e o Concello en cuestión.

#### TERCEIRA.- Financiamento

O presente convenio non comporta obrigas económicas para as partes asinantes.

#### CARTA.- Comisión de seguimento

Para velar polo cumprimento do estipulado, constituirase unha comisión de seguimento da execución do convenio, formada por tres representantes da USC e tres representantes da Federación Galega de Municipios e Provincias. Esta Comisión actuará como órgano de vixilancia, seguimento e control do establecido neste convenio, promovendo, se o considera adecuado, outras actuacións que poidan enriquecer o seu desenvolvemento, e reunirse en todas as ocasións que se estimen oportunas.

A presidencia e a secretaría da Comisión terán carácter rotatorio anual. No primeiro ano de vixencia do convenio a presidencia será ocupada por un dos representantes da FEGAMP, mentres que a secretaría será exercida por un dos representantes da USC. O presidencia da Comisión terá voto de calidade.

#### QUINTA.- Causas de resolución do convenio de colaboración

O presente convenio resolverase polo incumprimento total ou parcial dalgunha das cláusulas que o regulan.

Así mesmo, poderá resolverse por denuncia unilateral dalgunha das partes, previa comunicación ás outras partes cun mes de antelación, cando conorra algunha das seguintes causas:

- a) Por imposibilidade de cumprimento do obxectivo perseguido
- b) Incumprimento por algunha das partes de calquera das súas obrigas
- c) Causas excepcionais que obriguen a modificar substancialmente o obxecto do presente convenio.
- d) Imposibilidade material de executar o obxecto do Convenio por circunstancias excepcionais, que impidan o cumprimento dos compromisos adquiridos no mesmo.

#### SEXTA.- Publicidade

As partes asinantes deste convenio outorgan o seu consentimento para que os datos persoais e o resto das especificacións que constan no citado convenio sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia, no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, e en concordancia cos artigos 14 e seguintes da Lei 19/2013, do 9 de decembro, de transparencia, acceso á información pública e bo goberno.

SÉTIMA.- Inexistencia de relación laboral. A subscrición do presente convenio non implicará relación laboral, contractual ou de calquera outro tipo entre os profesionais que realicen as actividades obxecto deste convenio e a USC ou FEGAMP, de tal modo que non se poderá esixir a estas responsabilidade ningunha, nin directa, nin subsidiaria, polos actos ou feitos que teñan lugar durante o desenvolvemento do convenio.

#### OITAVA. - Protección de datos

O tratamento dos datos persoais que precisen as partes que asinan o presente Convenio, suxeitarase ao disposto na Lei Orgánica 3/2018, do 5 de decembro, de Protección de Datos Persoais e garantía dos dereitos dixitais, no Regulamento Europeo 2016/679 de 27 do abril e as normas que as desenvolven.

#### NOVENA.- Desenvolvemento

O presente convenio poderá ser obxecto de desenvolvemento a través das correspondentes addendas ao mesmo, nas que se determinarán as concretas actuación a realizar e, de ser o caso, os créditos destinados a financiarlas.

#### DÉCIMA.- Vixencia

O presente convenio entrará en vigor na data da súa sinatura e estenderá a súa vixencia ata o 31 de decembro de 2022, sen prexuízo da súa prórroga mediante acordo expreso das partes por períodos de seis meses ata un máximo de catro anualidades.

DÉCIMO PRIMEIRA.- Natureza xurídica e resolución de conflitos

Mediante a sinatura do presente Convenio, as partes comprométense a resolver de mutuo acordo as incidencias que poidan xurdir no seu cumprimento.

O presente convenio ten natureza administrativa, e como tal excluído do ámbito de aplicación da Lei de contratos do sector público, se ben se observarán os seus principios para a resolución das dúbidas e lagoas que se puidesen presentar.

Rexerese polas súas propias cláusulas e, supletoriamente, polas normas xerais do dereito administrativo.

As cuestións litixiosas que xurdan entre as partes durante o desenvolvemento e execución do presente Convenio e non poidan ser resoltas pola Comisión de Seguimento prevista na cláusula sexta, someteranse á xurisdición contencioso-administrativa, conforme ao disposto na Lei 29/1998, do 13 de xullo, Reguladora da Xurisdición Contencioso-Administrativa.

E en proba de conformidade, subscriben o presente convenio mediante sinatura dixital.

Alberto Varela Paz

Presidente da Federación Galega

de Municipios e Provincias de Galicia

Antonio López Díaz

Reitor da Universidade de

Santiago de Compostela